

Lo busca fondonan local y di Hulanda pa prome mantencion di Museo Arqueologico

Actualmente nan ta trahado plan di mantencion

ORANJESTAD - Museo Arqueologico ta un joya di museo cu ta existi hopi pa su mantencion, y pesei nan mester di fondo adicional pa asina garantisu su bon condicion y existencia.

Riba e punto aki, Directora di Museo Arqueologico, sra. Bibi Ruiz ta declara cu mester ta creativo pa asina procura pa museo lo por haya algun entrada cu por yuda nan pa mantencion di e luga. Sra. Ruiz ta indica cu e placa cu nan ta bin hayando for di e “cahita” di nan presupuesto, nan mester ta creativo, y haci actividad cu lo pone e hendenan pensa.

Actualmente nan ta trahado un plan di mantencion; y riba e plan aki nan a papia cu instancianan local como di Hulanda pa asina financia e prome mantencion di edificio monumental unda e Museo Arqueologico ta funciona. Si tur cos lo cana bon e prome mantencion di Museo Arqueologico lo mester tuma luga na inicio di 2012.

Sra. Ruiz ta bisa cu nan ta consciente cu ta un responsabilidad masha grandi pa mantene e edificionan. Y no solamente e edificionan sino e contenido historico cu tin un balor arqueologico incalculabel.

E aña aki tog nan lo realiza un par di trabou chikito cu no por warda te otro aña. Riba e parti financiero Museo Arqueologico tin pensa di haci atrobe un proyecto colaborativo entre e fondonan priva, y fondonan di Gobierno.

“Nos ta consciente cu Gobi-

erno so no por carga tur cos, aunke e tin un responsabilidad”, asina directora di Museo Arqueologico a declara na BON DIA Aruba. Nan ta bay busca fondo afo manera nan a yega di realiza pa otro hopi proyecto pa mantencion.

E ta bisa cu den e caso aki, mantencion no ta un cos acesorio, ya cu e ta un mester, y vooral ora cu nos tin un luga asina monumental y bunita manera Museo Arqueologico ta.

Ta berdad cu un edificio historico cu ta ser restaura ta keda masha bunita; pero e ta existi hopi mantencion pa cuide. Tin cierto murayanan cu salpeter a cuminsa sali, y naturalmente mester drecha nan.

Actualmente nan ta den deliberacion cu fondonan local y di Hulanda; y tur cos ta mostra positivo pa hunto cu Gobierno nan lo por pone e placa disponibel pa otro aña nan por cuminsa cu e destaho pa por haci e trabou di mantencion aki.

Nan mester warda ora cu e plan di mantencion ta bin cla pa asina nan por tin un calculacion riba e balor di e gastonan.

Ya varios experto a yega di calcula un suma pa nan, pero nan ta masha diverso. E parti historico di e mantencion aki ta hopi caro, pero e ta hopi importante pa mantene -segun sra. Bibi Ruiz- ya cu e beyesa di e luga aki cu Museo Arqueologico a uza ta un edificio monumental hunto cu edificionan moderno. □

